

PARLIMEN MALAYSIA
PERTANYAAN DEWAN RAKYAT

PERTANYAAN : LISAN
DARIPADA : TUAN CHE MOHAMAD ZULKIFLY BIN JUSOH [SETIU]
TARIKH : 9 JUN 2014 (ISNIN)
SOALAN : Tuan Che Mohamad Zulkifly bin Jusoh [Setiu] minta
MENTERI PERTANIAN DAN INDUSTRI ASAS TANI
menyatakan bilangan perusahaan sarang burung walit seluruh Negara termasuk di Terengganu dan nyatakan sasaran bilangan pengusaha sarang burung walit di Negeri Terengganu bagi tahun 2014/2015 serta nyatakan potensi pasaran sarang burung walit di dalam dan luar Negara.

JAWAPAN

Tuan Yang Dipertua,

Sehingga kini, terdapat sebanyak 60,000 buah premis perusahaan sarang burung walit di seluruh negara dan hanya 8,715 premis yang berdaftar dengan Jabatan Perkhidmatan Veterinar (DVS). Dari jumlah keseluruhan tersebut, dianggarkan sejumlah 2,000 buah premis sarang burung walit beroperasi di seluruh negeri Terengganu terutama 3 daerah utama iaitu Kuala Berang, Dungun dan Marang. Namun begitu hanya 566 buah premis sarang burung walit di Terengganu yang berdaftar dengan DVS.

Produk sarang burung walit adalah satu produk yang mana pasarannya adalah 80% bergantung kepada pasaran eksport. Negara Republik Rakyat China (RRC) merupakan pengguna terbesar serta merupakan pasaran tradisional produk sarang burung walit dari Malaysia. 90% dari jumlah keseluruhan eksport sarang burung walit Malaysia adalah ke RRC dan diikuti oleh Hong Kong, Macau dan Taiwan. Manakala

10% lagi eksport sarang burung walit Malaysia adalah ke negara-negara seperti Amerika, Australia, Itali dan Brunei.

Data pengeksportan sarang burung walit telah menunjukkan bahawa terdapat peningkatan pengeksportan sarang burung walit ke negara luar. Peningkatan sebanyak lebih dari 50% dapat dilihat dari jumlah pengeksportan pada tahun 2013 (190,426.20 kg) berbanding pada tahun 2012 (125,415.14 kg).